

**Pigisanik aalaakkaasunik piginnaatitaaffimmik pisisarnej imaluunniit
atuisinnaatitaaneq pillugu Inatsisartut inatsisissaattut siunnersuut**
*Ineqarnermut, Attaveqaasersuutitut Isorliunerusunullu Naalakkersuisumit
saqqummiunneqartoq*

pillugu

Inatsisinut Ataatsimiititaliap

siunnersuutip aappassaaneerneqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Aqqalu C. Jerimiassen, Atassut, siulittaasoq
Inatsisartunut ilaasortaq Kuno Fencker, Naleraq, siulittaasup tullia
Inatsisartunut ilaasortaq Pipaluk Olsen, Demokraatit
Inatsisartunut ilaasortaq Iddimanngiiu Bianco, Inuit Ataqatigiit
Inatsisartunut ilaasortaq Anders Olsen, Siumut

UKA2025-mi ulloq 1. oktober 2025 siullermeerinninnerup kingorna ataatsimiititaliap
siunnersuut misissorpaa.

Siunnersuutip imarisaa siunertaalu

Pigisanik aalaakkaasunik piginnaatitaaffimmik pisisarnermut atuisinnaatitaanermulluunniit atatillugu nunatsinni niuerfinnik nakkutilliinerup ersarissuunissaata attatiinnarneqarnissaa siunnersuutikkut siunertarineqarpoq. Tamanna innuttaasut pigisanik aalaakkaasunik piginnaatitaaffimmik pisinissamut atuisinnaatitaanermulluunniit periarfissaasa ajorserianneginnissaannut peqataaqataassaaq. Nunarsuarmi sumi inissisimaneq tunngavigalugu politikikkut maanna inissisimaneq tunngavigalugu taama malittarisassiornissaq pisariartoq paasinarsimavoq, tamatumani Kalaallit Nunaanni pigisanik aalaakkaasunik piginnaatitaaffimmik pisinissamut atuisinnaatitaanissamulluunniit nunat allat soqutiginninnerat annertunerulersinnaalluni.

2025-mi ilassutitut aningaasaliissutit pillugit inatsimmut oqaasertaliussaq Aningaasaqarnermut Akileraartarnermullu Ataatsimiititaliamut saqqummiunneqarlunilu ulloq 1. februar 2025-mi atuutilersussatut akuerineqarpoq, tamatumalu kingorna taanna nunanit allaneersut nakkutigineqanngitsumik pisisinnaanissaannut illersuutaagallarpoq. Siunnersuut matumani pineqartoq akuerineqassaguni inatsisitigut ataavartumik tunngaviliissaaq.

Siunnersuutip Inatsisartunit siullermeerneqarnera

Innuttaasut periarfissaasa ajorseriartinneqannginnissaasa qulakkeerneqarnissaa, taamaalillunilu Kalaallit Nunaata aningaasaqarnerata inuiaqatigiinnilu soqutigisat illersorneqarnissaasa pingaaruteqarnera siunnersuutip siullermeerneqarnerani pingaarnertut isumaqatigiissutigineqarpoq.

Tamatumali peqatigisaanik ernummatit arlallit oqaatigineqarput, assersuutigalugu malittarisassat aningaasaliinissamut aningaasanillu pissarsinissamut nalorninartorsiortitsisinnaanerat.

Taamatuttaaq danskit nunatsinni najugaqartut danskisut innuttaassusillit aammalu danskit nunatsinni najugaqanngitsut danskisut innuttaassusillit siunnersuutikkut immikkoortinneqannginnerat ernummatigineqartoq oqaatigineqarpoq.

Kiisalu innuttaasut nunanit allaneersut ukiuni marlunni nunatsinni najugaqarsimanissaannik piunasaqaat sakkukippallaarnersoq oqaluuserineqarpoq. Akerlianik danskisut innuttaassuseqarnissamik piunasaqaat inunnut Kalaallit Nunaannut aalajangersimasumik attuumassuteqartunut danskisulli innuttaassuseqanngitsunut tunngatillugu naapertuutinngitsumik immikkoortitsinermik pilersitsissanersoq ilaannit ernummatigineqarpoq.

Siunnersuut taamaalilluni ataatsimiititaliamit suliarineqartussanngorlugu innersuunneqarpoq.

Tusarniaanermut akissutit

Siunnersuut piffissami 4. juni 2025-mit 3. juli 2025-mut Naalakkersuisut tusarniaanermut nittartagaanni tamanut tusarniutigineqarsimasoq, soorluttaaq siunnersuut tusarniaaffigisanut arlalinnut toqqaannartumik nassiunneqarsimasoq Naalakkersuisut paasissutissiissutigaat. Tusarniaanermut akissut inatsisissatut siunnersuummut ilanngunneqarput, tamannalu Inatsisartut Siulittaasoqarfiata ilusiliinissamut piumasaqataataanut naapertuuppoq.

Siunnersuutip aningaasaqarnikkut kingunerisassai

Siunnersuutip piviusunngortinneqarnerani aningaasaqarnikkut kingunerisassat siunnersuummut nalinginnaasumik nassuiaatini allaaserineqarput. Tassani oqaatigineqarpoq siunnersuut pisortanut aningaasaqarnikkut allaffissornikkullu kinguneqassanngitsoq, tassa suliaasat Naalakkersuisunit akuerineqartussat amerlassutsimikkut killeqassasut, taakkulu aningaasaliissutaareersut iluini aqutsivigineqarsinnaassasut nalilerneqarmat.

Tamatumanissaaq nalilerneqarpoq Kalaallit Nunaanni pigisat aalaakkaasut akii neqeroorutigineqartorlu siunnersuutikkut sunnerneqassanngitsut, tamatumanili pigisanik aalaakkaasunik maanna pigisaqartut qaffasinnerusumik iluanaaruteqarlutik pigisaminnik aalaakkaasumik tunisinissamut attartortitsinissamulluunniit periarfissaminnik annaasaqarsinnaanissaat mattunneqarsinnaanngilaq.

Ataatsimiititaliaq tunngavissatut pigineqartut tunngavigalugit allatut naliliinissaminut pissutissaqanngilaq. Taamaalillunilu ataatsimiititaliamit tutsuigineqarpoq apeqqut Naalakkersuisunit misissorluarneqarsimasoq aammalu aningaasaqarnikkut kingunerisassanik malitseqassanngitsoq. Taamaakkaluartoq siunnersuut pisortat karsiinut annertunerusumik aningaasartuuteqarnermik nassataqassagaluarpat, aningaasartuutit taakku aningaasaliissutaareersut iluini akilerneqartariaqassapput, taamaattoqassappallu tamatuma kingunerissavaa suliniutit allat pingaannginnerusunngortittariaqarnerat.

Ilisimatitsiffiusumik ataatsimiinneq

Ataatsimiititaliap siunnersuummik suliarinninnerminut atatillugu Ineqarnermut, Attaveqaasersuutitut Isorliunerusunullu Naalakkersuisoq ilisimatitsiffiusumik ataatsimeeqatigaa, tamatamani siunnersuutip teknikikkut ilusilersorneqarnera misissorneqarluni, soorluttaaq apeqqutit assigiinngitsut siunnersuummut tunngasut oqaluuserineqartut.

Ataatsimiititaliap siunnersuummut oqaaseqaatai

Aningaasaliisartunut nunanit allaneersunut nunatta soqutigisaasa illersorneqarnissaat

innuttaasullu pigisanik aalaakkaasunik piginninnissamut attartornissamulluunniit periarfissaasa illersorneqarnissaat siunnersuummit pingaarnertut anguniarneqartoq ataatsimiititaliamit maluginiarneqarpoq.

Kiisalu inunnut danskisut innuttaassuseqanngitsunut Kalaallit Nunaanni aalajangersimasumik najugaqarnissamik inunnnullu nalunaarsuiffimmi nalunaarsorneqarsimanissamik kiisalu Kalaallit Nunaannut tamakkiisumik aammalu ukiut siuliini marlunni sivilisunerusumilluunniit akileraartussaataitanermik piumasaqaateqarfigineqarnerat ataatsimiititaliamit maluginiarneqarpoq.

Naalakkersuisut pisuni immikkorluinnaq ittuni immikkut akuersissuteqarsinnaanerit ataatsimiititaliamit aamma maluginiarneqarpoq, tassa tamanna inuiaqatigiit soqutigisaannut pingaaruteqartutut nalilerneqarpat.

Kiisalu inuit danskisut innuttaassusillit taakkulu tamakkiisumik ingerlatseqatigiiffii aningaasaliiffiusut Kalaallit Nunaanni pigisanik aalaakkaasunik piginnaatitaaffimmik killiligaanngitsumik pisisinnaatitaanerit atuisinnaatitaaneralluunniit imaluunniit Kalaallit Nunaanni nunaminertamik atuisinnaatitaanermik pisisinnaatitaanerit ataatsimiititaliamit maluginiarneqarpoq. Tamatumani danskisut innuttaassusillit Kalaallit Nunaannut attuumassutillit imaluunniit danskisut innuttaassusillit Kalaallit Nunaannut attuumassuteqanngitsut siunnersuutikkut immikkoortinneqanngillat.

Kiisalu 2025-mi ilassutitut aningaasaliissutit pillugit inatsimmut oqaasertaliussaq Aningaasaqarnermut Akileraartarnermullu Ataatsimiititaliamut saqqummiunneqarlunilu ulloq 1. februar 2025-mi atuutilersussatut akuerineqarpoq, tamatumalu kingorna taanna nunanit allaneersut nakkutigineqanngitsumik pisisinnaanissaannut illersuutaagallartutut atuussimammat ataatsimiititaliamit oqaatigineqassaaq. Inatsisitigut tunngavissavimmik pilersitsisoqarnissaata qulakkeerneqarnissaa, taamaaliornikkullu inatsisitigut tunngavissamik ataavarnerusumik pilersitsisoqarnissaa inatsisissatut siunnersuummi matumani taamaalilluni siunertarineqarpoq. Allattut oqaatigalugu siunnersuutip siunertarivaa maanna tunngavigineqartup (allanngorani) attatiinnarneqarnissaa, tamatumanili inatsisikkut aalajangersarneqarnera qulakkeerinnissutaalluni.

Inatsisissatut siunnersuut akuerineqassappat tamatuma nassatarissavaa Inatsisartut inatsisaatigut inatsimmut tunngavissamik pisariaqartumik pilersitsisoqarnera, taamaaliornikkullu aningaasanut inatsimmi oqaasertaliussamik ilanngussisoqartariaarutissalluni.

Inatsisissatut siunnersuut akuerineqanngippat pisisut nunanit allaneersut aningaasanut inatsimmi oqaasertaliussinikkut Naalakkersuisunit aatsaat malittarisassiuunneqarlutillu

nakkutilliivigineqarsinnaapput. Taamaaliornikkut taamatut periuseqarneq nalorninarnerulissaaq, tamatumani aningaasanut inatsisip ukiut tamaasa akuerineqarnissaa aammalu aningaasanut inatsisini tamani oqaasertaliinissap eqqaamaneqarnissaa apeqqutaalissammat.

Puigortoqarneratigut oqaasertaliussaq ilanngunneqanngitsoorpat tamatuma kingunerissavaa nunanit allaneersut pigisanik aalaakkaasunik piginnaatitaaffimmik pisinerat atuisinnaatitaaneralluunniit ukiumi pineqartumi nakkutilliivigineqarsinnaananilu malittarisassiuunneqarsinnaannginnera, tamatumalu naggataatigut kingunerissavaa nunatsinni inuiaqatigiit eqqorneqarnerat.

Ataatsimiititaliap inassuteqaatai

- Ataatsimiititaliami amerlanerussuteqartut Demokraatineersut, Inuit Ataqtigiinneersut, Siumumeersut, Atassummeersullu siunnersuutip akuersissutigineqarnissaa inassutigaat.

Ataatsimiititaliap taama oqaaseqaateqarluni isumaliutissiisummilu allassimasutut paasinnil-
luni siunnersuut aappassaaniigassanngortippaa.

Aqqalu C. Jerimiassen
Siulittaasoq

Kuno Fencker
Siulittaasup tullia

Pipaluk Olsen

Iddimanngiiu Bianco

Anders Olsen